




Vesta vers sidost, sin la Curciusa Alta.



Vesta vers la chavorgia da l'Areua.



Qua cumenza la lunga descensiu da radund 11 kilometers.



La Val Curciusa, in cural grischun

Da questa val han ins udi bler ils onns novanta. La Curciusa, situada tranter Valragn e Mesauc, vulevan ins najentar. Il matg 1999 han alura las Ovras electricas da Mesauc communitgà ch'ellas renunzian da realisar lur project cun centrala, mir e lai da fermada. 24 onns pli tard è il redactur da la FMR chaminà tras la Val Curciusa. Igl è in batschigl gigantic dad indesch kilometers lunghezza.

AUGUSTIN BEELI/FMR

«Vus stuais esser conscients ch'i n'è betg ina spassegiada. Ins chamina sis enfin set uras. L'emprim vai taiss ensi 850 meters. Alura chaminan ins radund 11 kilometers engiu, en stgallims, cuntinuadamain vers nord». Quai è stada la descripziun da la tura. Dacurt han il Parc Beverin e l'organisaziun WWF envidà d'emprender a conuscher la Val Curciusa. I saja ina cuntrada selvadia, han ins pudì leger vinavant en la descripziun. L'avertiment n'ha fatg nagina impressiun a las persunas ch'èn s'annunziadas. Per questa sonda aveva la previsiun da l'aura communitgà ch'i dettia giu la Bassa temperatures d'enfin 35 grads. Uschia èsi gist stà il dretg di per ir en las autezzas. E quai en ina cuntrada nunenconuscenta.

La Bocchetta, il sparta-auas

La tura ha cumenzà cun l'auto da posta en direcziun Bellinzona. La gruppa è viaggiada atras il tunnel enfin il vitg da San Bernardino. Là n'era l'aura betg favuraivla, i pluschignava e la tschajera n'ha betg fatg curaschi. En tut eran 38 persunas s'annunziadas. «L'onn passà avain nus purschè la medema tura, alura essan nus chaminads en quatter», ha ina da las manadras manegia. Dus giuvens spezialists da natira ed ambient, *Oliver Dosch*, oriund da Tinizong, e l'ornitolog bernais *Nicholas Lengacher*, han accumpagnà la gruppa.

L'ascensiun sin la senda signalisada vers la Bocchetta di Curciusa ha cumenzà immediat suenter il vitg. Durant duas uras e mesa è la gruppa chaminada atras ina spunda verda taisaglia. Ins n'ha già nagin motiv da sa lamentar – malgrà che la Val Mesauc è restada zuppada en la tschajera. Pradas plain gilgias alpinas alvas e gilgias tircas han pudì intgantar ils viandants.

«Questa Val Curciusa è datiers, e tuttina lontana.»

participantas e participants da la tura

Sparta-auas sin 2388 m s.m.

Suenter la traversada da la spunda sut il Piz Motton è la gruppa arrivada sin il punct aut da la tura. La Bocchetta di Curciusa è marcada cun 2388 m s.m. Igl è in sparta-auas. Vers sid van ellas vers la Moesa ed il Ticino, vers nord nascha il dutg Areua, quel sbucca oradim, a Novagnas/Nufenen, en il Rain posteriur.

L'Areua crescha e daventa in aual, el ha accumpagnà la gruppa atras la lunga val. Igl è pelvair ina cuntrada solitaria ed isolada. La Val Curciusa sa divida en duas planiras ed almain trais stretgas. Giu dal pass èn ils viandants e las viandantas arrivadas l'emprim sin la Curciusa Alta, in enorm batschigl verd. Oradim quel curra e meandrescha l'Areua plaunsieu vers ina stretga. Ins duai far ina pausa qua e tgi che gughegia, po far bogn en in batschigl natiral fradaglia.

Access davent da la Val Vignun

La senda da viandar che è marcada bain cun las



colurs alv-cotschen-alv cuntinuescha. I para dentant che la val selvadia e solitaria na piglia nagina fin. Da la stretga han ins pudì giudair la survista sin la Curciosa Bassa. Puspè ina planira impressiunanta. Sin quella chargian purs dal Mesauc vatgas-mamma. Sin nov dals endisch kilometers da la Val Curciosa chaminan ins dal rest atras territori moesan. Suenter quatter uras e mez ha la gruppa cuntanschi danovamain la «civilisaziun»: L'Alp de Rog, giudim la stretga da la Curciosa Bassa, è in spartavias. Qua sbucca la Val Vignun en la Val Curciosa. Per l'alpegiazion è l'access pussaivel sulettamain davent da San Bernardino atras questa val.

Davent da l'Alp de Rog inditgescha il mussavia anc 1,5 ura enfin Novagnas. Oradim quest funs verd entschaiva la chavorgia da l'Areua e pir qua è il cunfin Mesaun-Valrain. Quel passa en ina lingia atras la chavorgia, tranter dus pizs: Vers vest, direcziun San Bernardino, è l'Einshorn. Il piz vers ost è il Guggernüll. Sur quel ha la gruppa pudì observar cun il perspectiv ina rotscha tschess- ularin che sa laschavan purtar da l'aria chauda. Arrivads suenter set uras a la riva dal Rain posterior han ils viandants dà in sguard enavos e ditg in a l'auter: Questa Val Curciosa è dattiers, e tuttina lontana. Ella è pelvair in cural zuppà dal Grischun.